

03 JAN 1999

Pesawat

PESAWAT MERLIN-GT DIPERKENAL DI NEGERI-NEGERI

LANGKAWI, 3 Jan (Bernama) -- Kelab Rekreasi Udara Langkawi (KRUL) akan mempromosikan pesawat ringan amfibia jenis Merlin-GT ke beberapa negeri tidak lama lagi.

Timbalan Presiden KRUL Mansor Ismail hari ini berkata pesawat dua tempat duduk itu yang pertama dipasang di negara ini sedang dipandu uji sebelum digunakan sepenuhnya dalam kegiatan kelab itu.

Mansor berkata pesawat itu yang boleh mendarat di laut dan di darat, sesuai digunakan untuk aktiviti rekreasi dan melawat pulau-pulau.

Ia dipandu uji oleh jurulatih KRUL Kapt. Zainol Taib dengan dibantu oleh Mej (B) Ahmad Radzi Hashim.

Kejayaan memasang pesawat berharga RM70,000 itu dalam masa lima bulan adalah usaha gigih Zainol dengan dibantu oleh kakitangan Kumpulan MOFAZ, kata Mansor.

Komponen pesawat itu dihadiahkan oleh Perdana Menteri Datuk Seri Dr Mahathir Mohamad kepada KRUL semasa Pameran Maritim dan Udara Antarabangsa Langkawi (LIMA) 1995. Bagaimanapun ia tidak dapat dipasang ketika itu kerana masalah kewangan dan kesukaran mendapat peralatan.

Mansor berkata usaha bersungguh-sungguh memasang pesawat itu dijalankan sejak lima bulan lepas dengan kos pembelian peralatan dibantu oleh Jabatan Perdana Menteri.

"Pesawat itu merupakan yang pertama dipasang oleh anak tempatan di negara ini dan merupakan satu catatan sejarah buat KRUL," katanya.

Pemasangannya dibuat di kawasan hangar Kumpulan MOFAZ yang menyediakan kemudahannya secara percuma. Anggota pasukan kadet udara KRUL turut diberi peluang melihat cara ia dilaksanakan.

-- BERNAMA

ZI MAI